

FENA, BiH novinska agencija

27. februar 2014. godine

RCC - NAGRADE - DODJELA

NAGRADE RCC-a EFKI HEDER I JELICI MINIĆ

SARAJEVO, 27. februara (FENA) - Vijeće za regionalnu saradnju (RCC) ove godine dodijelilo je nagradu "Šampion regionalne saradnje" direktorici Centra za poduzetničko učenje jugoistočne saradnje (SEECEL) Efki Heder, a posebno priznanje za unapređenje regionalne saradnje pripalo je Jelici Minić.

Generalni sekretar RCC-a Goran Svilanović kazao je u razgovoru za Agenciju Fena da je Heder uspjela okupiti žene u regionu i uključiti ih u poduzetništvo, a sve radi promocije prava žena i ostvarivanja bolje pozicije u društvu.

Povodom šeste godine postojanja RCC-a Plaketa zahvalnosti dodijeljena je Jelici Minić koja je pet godina bila zamjenica generalnog sekretara RCC-a i jedna je od autorica inicijative glavne aktivnosti RCC-a na kojoj se danas radi, a to je izrada Strategije jugoistočne Evrope 2020 koja se odnosi na pitanja zapošljavanja i razvoja ekonomije.

Svilanović je naglasio da se radi o priznanju za osobe koje su u prethodnim godinama uradile veliki posao povezujući ljude bez obzira na razne prepreke - nacionalne, etničke ili vjerske i bez obzira na granice te su bile vođene time da mogu okupiti ljude oko neke zajedničke regionalne ideje.

Dobitnice nagrade u razgovoru za Agenciju Fena kazale su da im je izuzetna čast primiti ovo priznanje RCC-a jer ono potvrđuje da su radile pravu stvar i bile na dobrom putu kada je u pitanju razvoj regionalne saradnje.

- Ova nagrada je priznanje svim oblicima koje implementiramo u našem radu, a to su saradnja zemalja na strukturiranom partnerstvu kako na najvišem nivou u saradnji vladinih dužnosnika, tako i u saradnji među školama, stručnjacima, biznis asocijacijama koje rade na aktivnosti jačanja konkurentnosti male i srednje privrede zemalja jugoistočne Evrope jer je svima zajednički cilj održivi razvoj - kazala je Heder.

Zahvalivši na nagradi, naglasila je da je Centar kojim rukovodi osnovan na zahtjev osam zemalja jugoistočne Evrope iz potrebe ispunjavanja jednog od prioriteta Evropske unije - poduzetničko učenje koje je kao dio "soft" stečevine važno za podizanje konkurentnosti ekonomija zemalja jugoistočne Evrope.

Pojasnila je da učenje za poduzetništvo trebalo bi ući u sve zemlje jugoistočne Evrope kao ključna kompetencija jer je činjenica da u obrazovnom sistemu ne postoje glavni postulati ekonomske i finansijske pismenosti, a bez toga nije moguće u budućnosti graditi konkurentnu privredu.

Dobitnica posebnog priznanja Jelica Minić za Agenciju Fena je kazala da je dobro na ovaj način dati priznanje onima koji se angažiraju u regionalnoj saradnji, a istovremeno priznanje je i lična satisfakcija koje joj znači da je bila "na pravom putu" radeći u RCC-u.

Ocijenila je da se regionalna saradnja kroz historiju periodično pokazivala kao ispravna, budući da još od 19. stoljeća postoje pokušaji uspostave regionalne saradnje u datim geopolitičkim uvjetima, a potom su se

ti pokušaji obnavljali te su u periodu od 1930. do 1933. godine održane četiri regionalne konferencije koje su razmatrale sva ona pitanja koja su i danas aktualna što pokazuje da je to realna potreba regiona.

- Region i politički, i sigurnosno, ali i ekonomsko-socijalno ne može napredovati ukoliko nema međusobne saradnje. U to sam uvijek vjerovala i u skladu s tim radila zbog čega osjećam satisfakciju - dodala je Minić.

Podsjetila je da je u RCC-u radila kao dio tima, a zajednički su ispunjavali misiju koja se decenijama, pa i stoljećima, unazad zadavala i pojavljivala te je naglasila da su narodi u regionu odranije shvatali da je regionalna saradnja vrlo važna.

- Svi zajedno od početka ovog vijeka provodili smo misiju koja nam je javno bila zadana i koja se već zapravo utjelovila na cijelom kontinentu u samoj ideji i praksi Evropske unije kojoj svi stremimo - zaključila je Minić.

Nagrada "Šampion regionalne saradnje" dodjeljuje se drugu godinu pojedincu ili instituciji za kojega Sekretarijat RCC-a i njegov generalni sekretar ocijene da je u protekloj godini značajno doprinio razvoju regionalne saradnje u jugoistočnoj Evropi.

(Fena) gk/ bdž